

方山薛先生全集

方山薛先生全集卷二十三

記

遊紅石硤記

乙卯夏五月四日丁酉薛子視師至榆林謁撫院孝
泉王公公相見甚謹因劇論榆鎮古今事跡及沿邊
砦堡臺臺控制因革而於山川形勢尤歷歷若指諸
掌薛子不覺勃然有躍馬登臨之興旣辭出日已薄
暮矣憲寮楊明田同總戎李北峰過余分司各具帖
有汎蒲之約余謂二君不若攜出邊牆外一覽二君
曰且了此端午故事更當另議也再茗別去詰旦戊

成黎明指揮崔桐傳報孝泉公且至余攝衣出迓而
公輿已及門矣公下輿笑曰昨暮未及拜今若稍遲
則君又先顧矣待得余拜後君又將行謝顧故事是
重勞君也言甫畢明田亦至陪坐公謂余曰此處沙
漠比江南勝處不同余答曰聞此處有紅石峽甚勝
過峽又有所謂紅山寺者公曰此去套虜甚近余雖
熟知尚未輕出方山雖興高亦湏夜不收哨探停當
方可議行也旣而曰明後日且請方山於學宮一坐
明田與李總兵作陪余對曰某願待教不敢當此殊
禮公曰斯文之會自當脫畧况萍水之逢而有傾蓋

之知乎公三茗起行余與明田送至門公登輿且曰
今節日聞二君有會不必顧矣出邊之游顧緩之如
何余二人唯唯乃復至院門公傳免謝余遂往拜明
田北峰遂攜席合飲於鎮東泉上北峰謂余曰明當
請公於紅石峽一游如何明田曰此方山公之所欲
而北峰所當着意者也北峰曰吾已令人料理矣適
孟游擊自外至曰明日當奉公行無妨也次早已亥
余同明田謁謝孝泉公公延坐久余數辭出公曰得
無有出邊之游乎余以實告公曰必欲行至內紅石
峽則止余與明田出至北城門外北峰已戒軍旅兵

仗排列隊伍若出師之狀余與明田易鮮明便服北峰與孟游擊戎服佩刀繫弓矢於肘後從官把總頭目以下皆披執乘馬前導余不善騎北峰曰此吾良馬但縱之馳保無他虞率領官軍明盔明甲次序嚴整時余與明田北峰三騎並行孟作中軍前哨熟達數百人皆髻髻被獸尾執弓矢乘馬逼近余三人兩兩前導鳴笳胡曲後先相應行四五里至岡上北峰忽蹙口長嘯三軍吶喊馬皆奮鬣疾馳穿營繞隊廻旋轉折勢不可遏余以不能整控且驚沙迷目頗有戒心明田笑曰但憑馬行無恐也頃之鳴鉦馬遂蕭

蕭而嘶行列如前回顧隨行者約二千餘人余謂北峰曰今日太煩擾矣北峰曰此各有事者余不及細問又向西北行數里至峽口下馬山甚奇峻僧人皆居石洞中洞蓋前人所鑿成者高朗明爽委曲上下儼然堂室余謂明田此可謂絕奇矣明田曰更有奇者余相攜入洞盥洗叙坐見佛像奇古森列皆鑿石爲之者余曰不意此處有此奇勝孟游擊曰可見往時物力豐盛若此時則誰暇爲此僧焚香供茶亦甚有禮北峰謂庖人曰且先治飯遂小設於洞前樹下僧呼爲庭中瀟灑幽適沙土不至明田謂北峰曰雖

先用飯也。須飲酒數杯。左右捧酒出。各六七行。乃飯。飯畢。余謂北峰曰。飽飯後。率難飲酒。不若乘此時出。邊牆外一覽。明田曰。是也。遂各上馬。行出牆數里外。黃沙中忽見有山突起。余問北峰曰。此非紅山寺乎。北峰曰。然。又行數里。始至山。皆紅石。有石室五間。皆就山石鑿成。高廣方正。爽塏軒豁。不知何時所成也。中間佛像亦皆鑿石爲之。已被虜人殘毀。無完形矣。中間有石臺。臺上有野獸毛骨。蓋虜人不時出獵。往來其中。皆其所蹂踐者。中一間有斷碑一座。字已剥落。余細觀之。尚有成化七年字樣。蓋是時虜未入套。

此尚吾土也寺稍西南有石高數十仞水自沙漠來
從石流下匯爲石穴舊傳李繼遷塋其祖彝昌障水
別流而鑿石爲穴以塋及塋畢仍引水流於故道今
云墓在水下石穴中穴溢遂迤邐而南皆從石澗中
流入邊墻內爲今內紅石硤云余登紅山北望數里
間隱隱多草樹山下樵草束檐者無慮千百輩余顧
明田北峰曰此何等人北峰曰乃公前在途中所問
隨行之人也乘吾輩出邊時儘力打草一番每草一
束回至榆林城中值銀二錢今日得虜人之草約值
銀二三百兩矣明田曰始公以爲太煩擾不知其獲

利如此也此輩嘗自出邊打草往往爲虜人追而殺之今日乘便甚得所倚賴矣蓋榆林皆沙漠地惟此近河套地土得水故草木暢茂城中羊馬寔多藉此孟游擊曰若河套不爲虜人所據此處省錢糧不貲余曰吾在書冊中亦曾見有此說是時軍士競逐獸得黃羊羔一兔二余愛黃羊羔方玩之比峰忽曰天將大雨可以還矣遂各登騎疾馳馳至一空城北峰曰此近日開馬市所築也余下馬觀之比峰又促歸明田勒馬不下余即登騎同入壻內北峰謂明田曰至此無事矣方山公尚不知所謂大雨之故余已瞭

見草地中隱隱帳房動作此必都喇兒部下警覺打
草人故也余曰有是哉明田曰此常事也已而夜不
收哨探至果如北峰所料北峰遂命放砲呐喊疾趨
內紅石硤各即席飲酒孟游擊語次間甚知來歷余
因問之歷歷道在昔總制巡撫之賢者自余肅敏馬
端肅之外必以楊文襄爲首稱更曰近日則曾石塘
可惜也南川公惟一廉可取余笑謂明田曰將官如
此不可欺也酒半明田乃起與北峰較射設箭垛於
硤右山上隔水而射着一熟達收箭達恒立垛前明
田左右恐箭傷之呼之使避渠故立不去明田曰是

厮欺我也試射之看渠如何連發幾矢正中渠面渠輒以手所持矢格之明田乃呼之使去與北峰對射發矢多中而明田尤覺更勝余笑曰老將官猶不如我秀才官也北峰曰明田公本善射若他技則吾不敢多讓也射畢各以巨觥三酌遂各登騎而返鼓譟列隊如前打草人歡呼載道至榆林北城門日已落矣乃回分司得孝泉公招會學宮帖迨曉已亥同明田謁孝泉公公曰石峽之游樂乎乃告以直至紅山寺而返公曰此則冒險矣是日赴公招飲於學宮歷述外紅石峽之勝公曰待從容吾亦當一往也庚子

別孝泉公旋廊延車中無事偶攜雍大記檢之其所
記紅石峽紅山寺去向不同蓋何大復未至其地或
按舊志或得於所聞故尚未詳余因感是行頗奇遂
記其事孝泉名輪山西蒲州人明田名師震山東定
陶人時爲僉憲北峰名輔孟游擊名案

陝西乙卯科舉人題名記

嘉靖乙卯秋八月陝西鄉試舉士得李蘇等六十五
人夫旣錄其名於薦書矣監臨侍御史北郭浦公循
其鄉之故典命工立石題名置諸鴈塔蓋昭盛事以
示不朽亦因以寓勸戒也語方伯虛川殷公屬薛子

爲文以記之旂惟古之稱不朽者有三德爲上功次之言又次之今有司以言試諸士而諸士以言獲舉其自揆與功與德何如哉是舉也余寔濫預百執事之後見侍御公夙夜兢惕諭諸校文者必欲因言以求立德立功之士而撫卷擬議真有如不得已之心是諸士之遭際也豈偶然哉自茲以往立身行已服官奮庸誠無負於所舉之言則將來德銘彞鼎功著旂常而光昭史冊者皆茲石爲之肇端矣不然則亦猶夫人耳斯名之題人其謂之何夫舉士之制自唐始盛率書名鴈塔以侈榮觀時值都會先後所舉萃

天下之士無慮千百自今視之其名之最著與玉案
曲江同於流峙者韓愈陸贄之外唯一張彖耳其諸
雖文敷菁藻詞擬瓊琚咸無稱焉夫韓之起衰濟溺
陸之補闕拾遺其名垂百世固無足異彖惟不倚國
忠屏居嵩嶽而後之論人品者以其廉頑立懦亦竟
與韓陸齊名然則出處顯晦之間皆爾諸士自立之
地其所以題不朽之名者蓋更有在也余承侍御公
之委方伯公之推且與諸士有一日之雅故於斯記
敢附以規不以頌之義唯爾諸士諒哉

壽春堂記

臨淮侯盱山李公築壽春堂于 賜第之東累石爲
山引水爲池而竹樹葱鬱交映於堂之左右蓋寔金
陵一勝槩也公于政事之暇往往集高人逸士談玄
論道於其中屬余爲文以記之余因詰之曰堂名壽
春其義何居公曰吾之所謂春者匪直春之爲春也
元氣流行歲功順序四時皆春也庭幃雍穆長少咸
宜一家皆春也上下志同百寮和衷一國皆春也四
海乂安諸福畢至天下皆春也前乎旣往後乎方來
循環無端終始不息千百世皆春也吾游息于斯堂
唯見春意之活潑而不知溫涼寒燠之代謝也堂是

以壽春名也余曰然哉是春也天下之人孰不有之
但常情或逐逐於富貴或戚戚於貧賤或怏怏於順
逆修短或役役於感應酬酢拘牽迫滯動輒有礙斯
其人雖當春陽和煦之時猶若困於嚴寒酷暑之中
而不能脫然自釋也若公之所謂春者彼惡知之唯
公天分最高直超本體玄關獨悟徑達希夷而元精
元氣元神一心統之而渾然全具此所以充然自得
無時無處而非春也雖然亦豈易致哉蓋公之先世
岐陽武靖王爲我 高皇帝之甥佐 帝平定天下
勲業獨隆封國錫爵重以河山帶礪之盟再傳而中

經震逼至公而始復之則公平生閱歷之周造詣之至而所見之大要亦有自非獨得於天者然也夫人唯得之不深則存之志慮者滯而不融人唯見之不

大則措之施爲者狹而不廣公之所得所見若此將何適而不可由是而統百萬熊羆之士必能掃陰山之氛淨鯨海之波以續我祖考由是而聯只尺禁近之班必能陪黃閣之議壯紫微之觀以宣上威德殆與天下同春矣不然則輕裘緩帶撫髀便腹而與赤松黃石之儔偃仰於泉石之畔收天下春歸之肺肝固自浩浩如也登斯堂者其尚有以觀公之深乎

介石書院崇祀記

蘇常東南文獻之郡也蘇有學道書院祀言公子游
常有道南書院祀楊公中立俾後學瞻依將由是以
沂伊洛洙泗之傳其興起士類關繫世風豈小補哉
先年倭夷突至倉卒兵興講武經賦增設官司一時
建牙開府不遑創造遂改學道書院爲督糧道道南
書院爲兵備道而兩賢祠宇輒爲布按分司吾黨亦
嘗有言而當事者以時詘舉羸率皆難之然而衝衢
要津立坊樹表輝金炫碧往往動費千緡弗計也余
竊有感焉夫中立爲程門高第弟子而寓常最久常

之人聞其學而知所向往者皆其功也論德論功旣已不可無祠矧子游生於吳中當其時吾夫子設教東魯弟子蓋三千焉而江淮以南幅員不啻萬里億兆之人何可勝數知從夫子者唯子游一人且在七十子前列昔人謂南方之學得其精華者自吳公始不信然哉此其德與功尤當首祀於吳者也乃竟遷其俎豆是遵何說哉若謂時當尚武則右干戈而左禮樂然則有虞之世舞干苗格迨至春秋卻縠猶以詩書強晉豈皆迂儒之說邪乃茲懷東顧君厭居市紛築室於大石山中與一二同志講學論道有司顏

其扁曰介石書院蓋懷東爲給事時敢言直諫有不
俟終日之義真得介石之操及今避居山中景哲追
修至謁諸賢於夢寐於是崇祀子游于院中而以宋
儒王蘋先生與其始祖原魯先生旁列左右庶幾夙
夜陟降庭止以畢平生友賢師聖之志也王先生宋
史不爲立傳而郡學先賢祠中與范仲淹胡瑗尹焞
李侗陸九淵楊簡魏了翁諸賢並祀名在伊洛淵源
原魯先生生於元季學宗濂洛歛衽讀書憑几矧寸
餘遺跡尚在具在太史鄒謙之楊用修瞿師道諸君
祠堂記中皆可徵信也先歲甲寅給事君亦嘗以原

魯祠堂記委余余見諸君旣已備述不能復贊一詞
爾來十有三年未有以復也卽今丁卯夏六月給事
君乃復申前請而以介石書院事示余余故爲之記
命工刻石院中

海鹽錢氏義田記

海鹽東畬錢公置義田以贍族人迄今垂四十餘年
而公亦歿十年餘矣公之子藹追念先德且將以訓
示後人俾克有終特走使山中請余爲之記余惟天
下有定理有定分唯義則變動不居一本於此心之
裁制行而宜之之謂也田以義名則不屬人已不分

彼此歲取其生殖而儲之以給宗族唯所當給者給焉是蓋君子水木本源之思周窮恤匱之念因天下之宗法久廢不能遂復特以義起者也義則公不義則私義則和不義則乖故唯常適於義者主之斯能持之於永久而不變也昔范文正公置義田其子堯夫之高義又克類公者久要不忘宜若無竢於言已而錢公輔作記乃猶慮及其後世子孫謂必修其業承其志一如公之存焉斯可也此其規勉之意雖切而措之詞者猶若微而婉焉迨後東陽陳德高立義庄以效文正公故事而陸務觀記之則直謂後人或

貪而專利或嗇而吝出或夸而廣費或挾長挾仕挾
有力之助而敗約則莊且壞而不支矣豈其言之過
於切直哉君子成人之美慮遠防微而預爲之箴砭
者不得不如是也茲秦溪錢氏爲海鹽望族東畚公
以進士起家歷縣令主事員外郎郎中以至郡守所
在以德政著稱上䟽請老優游林下者二十餘年立
詩社建先祠置祭器舉藍田呂氏鄉約其風示鄉邦
者率由行古之道矣而置田以贍族者此蓋其一端
也子六人蓼芹萱葵薔蓀與其姪薇公率課之學業
躬督其成芹萱薇後先舉進士蓼葵薔蓀皆太學生蓀

縣學生茲蓼芹萱薇亦卒而薈等獨負荷先業克紹厥義猶恐後人馴至廢墜以余有年家之誼言或可以信今傳後故特以記屬余不佞其何以爲錢氏助哉特述公輔務觀作記之意俾錢氏子孫世世念之自當發其永言孝思繩其祖武之心矣東畬名某字某東畬其別號也田若干畝坐落某處歲入租若干石

常州府重修儒學記

郡大夫龍岡施公蒞郡甫半載政通人和修廢舉墜尤作興士類加意膠庠約已省民徹堂饌贖金以葺

郡學凡殿堂齋廡經閣射圃門坊廨舍無不經理又
濬玄武河周圍曲折凡若干丈其故址之久沒於民
間者更代數易莫究所自悉量值以酬之而盡復其
舊於是學宮氣象鼎新形勢增勝士庶父老咸爲改
觀舉忻忻相告曰宏才碩學高科大拜行將於是乎
出矣唯時教授譚君安之訓導王君敏學曹君綽伍
君棟林君安民躬率諸士詣薛子山中請爲文記之
余追惟嘉靖戊申前守文麓郭公以修學記見屬余
嘗有言以勒諸石矣歷今已逾二紀日漸頽圯龍岡
公茲舉匪直美一時之輪奐而幾百年之湮塞前政

屢欲復而中輟士心久屬望而未遂者一朝就緒余
敢不記其成事推其至意爲吾黨申告之乎昔人有
言太守士民之本人才之盛衰風俗之污隆上下古
今恒必由之吾常古之延陵春秋時吳公子札以禮
樂聞于上國而見推于洙泗蓋首善之地也迨宋龜
山楊先生親承伊洛之傳政和間寓茲十有八年載
道振鐸聲應氣求士類翕然興起于時吾常若鄒志
完之父子周伯忱之伯仲尤遂初之師弟轉相授受
而唐彥思喻子才胡德輝諸子又相與講明而輔翼
之一時家傳人誦唯正學是務而稍有志節者皆引

領門墻耻不爲君子苟學有不類雖霍仁仲以狀元及第立朝大節亦有可觀然以其從事王氏之學以取科第而論者猶責備焉若孫仲益者以文章名天下而學無嚮方君子少之是時常之學術正議論嚴人才日盛教化日隆駸駸乎與鄒魯同風故志稱江淮以南諸郡唯常禮義之俗寢盛蓋有自哉余自諸生以至筮仕初猶及見一二前輩尚以學術相規勉而慎擇所趨邇數年來四方士人所在講學中多僞妄遂招羣議吾黨懲創太過以致因噎廢食而其流之弊侈肆成風漫無忌憚將不知其底至龍岡公進

學校諸生而勤於課試銳於修復者豈專在於詞章
科第間哉此其至意庶幾諸生因文見道居肆成事
而藏修游息之間或得以觸其本心之良革其末習
之謬憮然感悟而上尋龜山伊洛之傳以紹復延陵
之禮樂亦未可知也誠若是焉則是舉也有大造於
斯郡而推之以風四方其有功於吾道所繫蓋甚大
矣貳府郭公某通府某公某推府某公某武進縣令
茹君某皆協贊其成與有勞焉余不佞敬因師生之
請而記其大都其諸造作之月日工程之數目別有
記籍不書隆慶壬申春三月旣望

永嘉王氏宗祠記

王氏宗祠者故福建叅議東崖王公澈所立以祀乎其先者也王爲温州永嘉鉅族宗祠之立寔自公始公自謂以義起之余則謂宗法之廢久矣此舉寔猶行古之道匪徒緣情協義而已余前視學浙中已嘗聞之欲爲表著以風四方而科舉期迫校士方殷將俟稍選爲之旣乃調遣西歸遂置不復論邇來二十餘年矣公之冢子西華憲副君叔果不遠千里遣書走幣於晉陵山中屬余記之余正欲因王氏之祠推原宗法之本始以闡明於人士間敢以不文辭追惟

古昔先王因生以賜姓因姓以成族而大宗小宗之法寔自上立之立宗者所以收族也於是天下之人莫不有族天下之族莫不有宗凡貨財所殖則歸於宗人掌之凡用度所需則資於宗人給之是以合族之恩義相屬而族人之貧富適均舉一族而天下之族皆然先王之世所以揖讓而天下治者率由此道也迨夫大道旣隱天下爲私宗法廢而同氣分爲爾汝族人至不相識漢文朝號爲有道之世而斗粟尺布之謠箕箒諍語之說且播聞於天下矣他安望哉唐太宗欲法三代之治詔高士廉岑文本集天下譜

牒參考史傳作氏族志其時宗法之立盖有幾焉而房杜諸公不能贊而成之宋儒迭起講究宗法至詳備矣然唯立論於師友之間而未及申明於朝廷之上豈古法真不可復邪抑勢重難返有不得不因循者也故范希文之義田蘇明允之族譜亭朱元晦之義學記莫非宗法之遺意而竟不能推行於天下此有志經世者所以未嘗不爲之扼腕也今東崖公乃於其祖墓之側建祠祀其始祖萬十一翁以報本反始配以三世祖樵雲及始封通政君谿橋以崇德報功祠爲中堂三楹旁有兩廳左右廊廡環列以爲會

餒之所約可容千人堂之外爲儀門又外爲石坊題
曰王氏宗祠費凡千金皆出自公一人不以煩族衆
經始于嘉靖壬寅至癸卯春落成祭薦有期洗腆惟
謹合族長幼示以儀注申以訓辭衣冠濟濟肅雍將
事且著族約立約正司訟司糾察舉淑慝有不率者
遵族約以聽于祠一不閔于有司其諸義田義塾家
禮戶役咸條理曲當刻示族人俾知遵守於乎若茲
祠者其關繫世風豈不大哉余嘗遡觀古之世家其
宗法之相承者唯博陵崔氏江州陳氏浦江鄭氏并
此僅四見焉爾誠能達之天下固可幾而理也昔張

子厚慨井田之不行嘗欲買田一方與學者行之而迄未能舉孰與東崖公之宗祠乃竟成之使天下之爲士大夫者皆若公焉以爲民先則宗法不將徧行於天下矣乎是祠蓋樹表立極殆不止一家一方之慶也余故記之以復於西華君西華仲氏陽谷憲副君叔果共承宗祠尤銳志於復古亦謂不可無記敢請以是勒諸麗牲之碑

龍城書院記

吾常舊有道南書院祀宋儒楊龜山鄒道鄉周伯忱伯溫唐彥思張子厚鄒德久喻子才胡德輝尤延之

李元德黃商伯王子正石子重蔣良貴錢升之及
國初謝應芳凡十有六人簡諸生之志於理學者講
肄其中俾觀法焉數十年來亦旣彬彬然興起矣迨
嘉靖乙卯丙辰間海寇陸梁東南用武而一時有司
右干戈而左禮樂遂改書院爲兵備道而諸儒之祀
盡撤仁人志士莫不爲之扼腕冀圖興復而未有能
倡之者隆慶辛未郡守施侯觀民至養士治民勤於
課試於是撫按提學諸公咸屬侯爲興復之舉侯乃
卜地於府治之東南舊晉陵縣廢址築焉上下寮屬
咸協恭宣力以佐成事改題曰龍城書院屬薛子應

旂爲之記旂惟自古學校之設三德六物之教莫備
於三代延及兩漢賢良文學猶有古意迨隋唐間以
文章設科取士而士人之所服習者遂多虛詞濫說
至宋雖學校徧天下而以德行道藝爲教者自蘇湖
之外無聞焉於是泰山徂徠一二儒者各以其學教
弟子而學校之外自不能無書院之設矣匪直勢不
容已亦理所宜然也然由今觀昔書院之載諸誌傳
者更僕不能悉數而其最以名聞號爲四大書院者
曰石鼓曰嶽麓曰睢陽曰白鹿今唯白鹿尚爲士類
侈傳而其餘三者則寂乎無聞雖有南軒考亭之記

垂諸各集而勒石之在彼中者未免爲荆棘之銅駝
矣夫均一書院也何以不白鹿若也蓋白鹿以考亭
象山爲之師而黃直卿蔡仲默李敬子黃商伯之屬
爲之徒皆潛心伊洛沂流洙泗而繼往開來真有功
於吾道是以凡有人心者莫不傳聞想慕猶若耳濡
而目染也雖百世可必其如一日孰敢廢之彼三書
院曰師曰弟子云者曾有同於白鹿否乎無怪乎其
湮且廢也吾是以願吾黨諸士之游于斯者尚其重
念今日諸公作興之盛心鑒觀前代書院興廢之故
事必反躬實踐以爲學而不專務於詞章必古昔先

哲以爲歸而不汨沒於世俗謹善惡邪正之幾嚴公
私義利之辨言必由衷行不失足由是而出可以範
模朝著由是而處可以表正鄉閭俾後之人指而稱
之曰斯當時龍城書院所養士也豈不於諸公是役
爲有光行將與白鹿書院並稱哉夫是役也經始於
隆慶壬申之五月不踰年而告成市材鳩工各捐俸
措置一不煩民院之制前爲大門爲儀門內有池跨
池有橋左右有翼室正堂五楹川堂二楹後堂五楹
後立先師廟三楹設聖位于中以竟諸儒沒齒步趨
之心以啓後學必要其極之志非敢瀆也左右有池

有亭後有堂設龜山諸儒十有六位左右各房二間
爲教官講讀之所此外東西號舍各十層每層九間
共一百八十間陸續置書院田一千一百五十七畝
三分五釐八毫以供祭祀以給師生田址丘數佃人
府縣具有冊籍督工官耆姓名并刻石末

方山薛先生全集卷二十四

傳

舒修撰傳

脩撰舒先生名芬字國裳江西南昌進賢人也其先
世居浙之東陽元大德初有名文英者始徙進賢之
梓溪載傳至溥震溥震生廷式廷式生法皆積德累
行世雖未顯識者已知其後必有達人法娶聶生先
生幼即岐嶷峭穎異於凡兒甫成童入郡學嘗作赤
鴈賦郡守竒其才謂當魁天下進賢有石人灘相傳
謂灘合則狀元出人遂以石灘稱先生蓋期之也先

生遜避別號梓溪家貧清苦不與人羣雖於書無所
不讀寔勵志聖賢之學不屑爲博物洽聞之士端居
終日未嘗晝寢夜必計過自訟每悼俗學之陋嘗曰
吾唯欲出以行志耳不然則聲律對耦之文可無作
也故其爲文氣志渙發理道暢達一洗回互隱伏支
離纏繞之習正德丁卯舉江西鄉試明年入南太學
譽望籍籍祭酒司業以至六館師生罔不起敬丁丑
舉禮闈入對大廷賜及第第一授翰林修撰嘗謂
古禮樂久廢恒游心於周禮鍾律無益詩文一切謝
去戊寅春權倖江彬等蠱惑武宗勸之游豫議以

三月壬子警道東巡祀岱宗歷徐楊抵金陵下姑蘇復沂江浮漢登太和太嶽且徧中土繁麗諸處將相大臣多從諛之都下人情汹汹危懼先生乃約諸同志上疏乞留俱會闕下吏部尚書陸完迎諸上疏者曰主上聞直諫輒引刀爲刎狀今且撒賴矣其容色詞氣盡歸咎武宗以沮言者一時言官又多其黨遂爲所沮先生乃邀吏部郎中夏良勝禮部郎中萬潮太常博士陳九川舉酒酹之曰匹夫不可奪志吾輩乃爲大臣所奪乎遂連疏入於是吏部郎中張衍瑞禮部郎中姜龍兵部郎中黃輦孫鳳員外郎

陸震刑部郎中陸俸行人司副余廷瓚等俱連䟽入時又有太醫院醫士徐鏊以醫諫上大怒車駕亦不果出下黃鞏陸震夏良勝萬潮陳九川徐鏊於錦衣獄先生與張衍瑞姜龍孫鳳陸俸等百有七人俱被命跪午門外梏拳跪五日旣余廷瓚等亦下獄黃鞏等六人亦在午門外梏拳跪五日是時工部主事林大輅等三人大理寺正周叙等十人亦連䟽入俱下之獄尋亦梏拳跪五日復有金吾衛指揮張英肉袒戟刃於育諫數日天色陰霾京師震駭公卿出入輒被唾罵投擲瓦礫遂減去跟辦官吏往往在昏暗時

行乃益謀蔽惑請命禮部禁約不許言事通政司遂
格不受疏堂官獻諛者叅劾司屬爲妄言由是上
怒遂不解戊午水溢內海子四五尺折橋鐵檻是日
先生等一百有七人俱褫衣廷杖先生以疏首杖特
甚神色不異唯口呼高廟之靈冀以感動上心
杖畢幾斃裹創卧院中掌院者懼禍使人標出之先
生屹不爲動曰吾官于此當死于此旣而復蘇謫爲
福建市舶副提舉其餘罰俸有差上怒猶未解四
月巳卯黃輦諸人亦俱褫衣廷杖林大輅周叙余廷
瓚降級調外任徐鏊戍邊其餘爲民時死杖下者陸

震余廷瓚主事劉校何遵評事林公黼照磨劉珪行人孟陽李紹賢劉平甫李翰臣詹軾九十有一人先生惻惻歎曰使余肯從宰臣之沮則諸疏且緩矣今致諸臣之死芬可以獨生平聞者感發君子謂先生此舉振士氣沮奸謀植風化寔有大功於世教也辛巳今上即位詔起先生適宅父憂嘉靖癸未秋服除復脩撰甲申夏會議大禮先生疏凡三上伏闕得罪再杖於廷明年乙酉母太安人卒于官舍先生扶柩歸由長江至彭蠡忽颶風鯨波大作先生號顛風濤頓息君子謂誠孝所感云丁亥春三月疾作十有

四日卒距生成化甲辰三月十有二日年四十有四
所著梓溪集若干卷詞嚴義正如其爲人編輯周禮
定本則尤其所注意也先生平生不事生業家無立
壁巡按江西御史儲良材爲小築省城居其妻孥子
三人忝奉奏薛應旂曰余昔過進賢進賢士人頌舒
先生從事聖賢之學與其歷履比舊聞加詳恨九原
不作不及言從之邁及官留都泰泉黃才伯往往爲
余談成化間羅燹正劾大臣遭喪起復章德懋黃仲
昭莊孔暘不作應制燈辭皆上䟽落職當時謂之翰
林四諫迨 毅皇豫遊時史官敢諫者則唯舒國裳

一人矣吾黨自謂清華獨不念輔導論思之職乎因
出翰林先後姓名授余志之余寡陋因循未之撰次
值有論學者援東漢諸人而擯氣節謂舒先生非聖
賢之學然則聖賢固無氣節者邪蓋自正德丁卯逆
瑾讐虐戴銑諸人始矯制褫衣受杖死者相繼又十
年庚寅再罹此變於是士人漸爲此論嗚呼此可以
觀世道之推移矣余重有感焉作舒修撰傳

涇野先生傳

涇野先生姓呂名柟字仲本陝西西安高陵人也西
安爲古涇陽之域學者稱爲涇野先生始祖名世昌

載傳至彬卿生八八生興興生貴貴生鑑世有隱德
鑑生溥尤以行義孚於鄉黨排難解紛人多德之配
宋氏生先生後以先生貴封翰林脩撰宋贈安人安
人爲潘府教授玉之孫女教授幼好書人號宋五經
以賢名於時安人少習其教先生孩豎時即誦其祖
教授公之遺行以教之故先生七八歲時敦厚穎敏
如老成人遣就傳于周丈人節之聞小學之教及入
學受書于孫行人廷舉時未總角輒有志聖賢之學
不爲辭章之習夏居矮屋衣冠危坐雖炎日蘊隆不
出戶限及冬月嚴寒則履藉麥草誦讀六經恒夜以

繼日弘治乙卯丁母安人憂哀毀讀禮未嘗輕出服
闋猶思慕不已辛酉舉陝西鄉試念母不及見輒泣
下明年壬戌會試未第乃入太學會三原榆次安陽
林縣陝州河內諸同志之友相與切磋務事力行不
尚口耳時雖爲太學諸生而識者固已知斯道之有
屬矣正德戊辰舉南宮高第入對大廷承法天法祖
之問反覆以仁孝爲言而要之於學上與公卿太
臣嘉賞之賜進士及第第一人授翰林修撰尋爲經
筵講官直以輔德弼違爲已任其諸編摩纂輯則務
盡古史氏紀動紀言之職詞華藻麗皆所不屑也嘉

靖甲申夏五月上疏自劾不職者九十有三事當路者謂此皆大臣宰相之職不宜引爲己責謫判解州至則贊州長以政教勸率士民酌取藍田呂氏之規以行鄉約刊訂朱子家禮以正習俗儒生學子羣至受業潛江初御史杲按山西爲建解梁書院以居之御史亦時時就而論學居三年解俗爲之不變延及全晉亦駸駸乎復陶虞耕稼質成讓田之風丁亥量移南考功郎中凡南官考績評定賢否詞若渾融實多所懲勸稽查吏籍革除詐冒一切奸宄盡爲屏息公餘即集問道請業之士懇懇爲發明講解或寮友

邀游金陵諸勝亦時復一出雖登臨玩賞中率多師
師規勉之意初寓柳灣精舍諸生屢盈戶外乃卽驚
峰東所居焉及遷尚寶卿歷太常少卿吏事簡省四
方從游者日衆先生樂於成人應接不倦是時海內
講學者相望而起然或未免空談先生與諸生約每
會卽以六經四書質正就於其中探討精義勉其體
認踐履或問朱陸同異先生曰晦菴象山同法堯舜
同師孔孟雖入門路徑微有不同而究竟本原其致
一也亦何害其爲同哉學者不務力行而膠於見聞
以資口耳竟於身心何益聞者多感發興起其訓釋

經籍皆躬行心得之言有程朱所未發者故所至學
徒如雲滄霧集乙未進北國子祭酒時監規久弛先
生發明揭示動以身教一二貴游子弟有不率者即
繩之以法不少假借於是咸知所從事而乞差爭撥
之敝風頓息或有以敬敷五教在寬規先生者先生
曰寬非縱弛之謂乃日刮月磨以要其成而不責效
於旦夕故謂之寬然云敬敷則不可不謂之嚴矣古
稱師嚴然後道尊道尊然後民知敬學其意正謂是
也今人才漸不如古豈真古今人不相及哉內則祭
酒外則提學皆有師道而以教人爲職者率多姑息

假借而不知人才之日流也甘臨希悅違道干譽且
非治民所宜矧以之教士哉規者不以爲然而先生
持之愈堅國子諸生自是知所檢束而絃歌之聲禮
讓之俗洋洋於京師首善之地矣丁酉陞南京禮部
右侍郎未幾以災異自劾得致仕去壬寅某月日以
疾卒於家年六十四所著有四書因問周易說翼尚
書說要毛詩說序春秋說志禮問史約宋四子抄釋
詩學圖譜寒暑經圖解史館獻納南省奏稿涇野文
集詩集監規發明署解文移各若干卷行於世然皆
仁義之精華孔顏之正脉有非遷固以來文人學士

所能與者嗚呼先生內充外裕色溫氣和藹然可挹
而行方詞厲守堅力定在朝在野隨寓盡道其真富
貴不淫貧賤不移威武不屈者矣君子方之程伯子
豈不信然哉長子田以舉人爲汝寧府通判少子昀
以先生廕爲都察院照磨云薛生曰某爲諸生時嘗
從先生於鷲峰東所而先生之所以切切啓迪者則
寔未嘗一息敢負也今年庚戌來京師其子昀以先
生年譜示余作傳顧某淺薄何能傳先生哉特以先
生生關中關中風聲氣習淳厚閎偉剛毅強奮莫不
有古之道然自漢以降其所謂豪傑者大都欲以古

文辭名世故至於今關中士人動稱西京西京云其
潛心理道而務以聖賢爲歸者宋張子厚之外非先
生其疇爲首稱邪某是以論著之于以見關中之學
獨文辭乎哉

陳恭愍公傳

陳恭愍公名選字士賢浙江臨海人宋國子司業左
輔之後由婺徙台之仙居再徙臨海公父員韜宰新
城有惠政後爲御史按閩訊沙寇脅從者數萬人悉
釋之卒官福建右布政使人以爲未食其報嗣當有
人生公自少端慤寡言立志以古聖賢自期潛脩獨

詣不求人知惟以克己求仁爲要因自號克菴景泰
庚午舉浙江鄉試天順庚辰以會試第一人成進士
授監察御史會脩撰羅倫論大學士李賢遭喪起復
謫官諸在言路者默若罔聞公獨抗疏直之倫雖不
復而賢亦竟沮天下自是始畏公議及按江西務持
大體布按長貳有過卑獻諛者公曰有憲綱在妄自
尊大吾不敢也悅不以道吾不願也諸皆動色相戒
舊習頓革旣提學南畿黜浮崇實寬嚴得中校士一
以德行理道爲本試卷明列諸生姓名並不彌封編
號曰吾不自信何以信於人邪所歷郡縣居宿學宮

端坐沉默以身率教每令諸生讀小學習六經體認經典措之踐履徒文無益也士習翕然不變時御史大夫長洲韓雍以功業顯頗尚崇飾方憂制家居聞公至悉屏儀衛曰毋令陳御史知也是其所推服者豈獨諸生焉爾哉成化初遷河南按察副使整飭兵備尋改提學其所設教一如南畿中州學者咸慶得師會倖奄汪直被命巡郡國威倖人主都御史以下咸匍匐趨拜公獨長揖直怒曰爾何官敢爾公曰提學直愈怒曰即提學便如何爾寧大於都御史也公曰提學何可比都御史但宗主斯文爲世表率雖死

不可缺節直見公詞氣嚴正舉止安舒而諸生儼集
署外知不可犯遂改容曰先生旣無公務相關自後
不必來見矣公即徐步而出尋轉按察使政尚易簡
釋繫囚除苛細凡諸宿弊名爲舊規者一切罷革獨
於賦吏不貸然受賂百金者要辭但列六七錢或問
之公曰污人惜財如惜命若責賂厚彼挈而貨權人
則法撓而難除矣然亦權以待茲時非正法也自是
官屬歛戢父老歡呼載道未幾聞母喪即日奔歸行
李一肩士民泣送者數千人立生祠祀之服除擢廣
東右布政使踰年轉左時嶺南苦鎮守中官椎剝瓊

僭騷然公乃嚴條約革和買減泛徭爲惠養計會肇慶大水公卽具奏災傷狀因體勘展轉民命旦夕竟便宜發倉賑之市舶太監韋眷縱恣掊剋籍富民供辦公奏減之眷復以私艦通番爲番禺知縣高瑤發覺沒貨鉅萬都御史宋旻等不敢詰公獨移文獎瑤眷深憾之番人馬力麻者貿貨海口詭稱蘇門答刺國貢使眷利其珍奇將許焉公發其僞逐之又有撒馬兒罕使臣泊六灣還國在道至廣謂將往蒲刺加市狻猊入貢所過震驚公乃上言臣聞西旅貢獒召公進諫越裳獻雉周公致規蓋不惟防玩好之漸寔

以杜窺伺之萌也廼者珍禽奇卉旁午徵求外夷小
醜探聽舉動豈真有貢獻之誠惟以邀賞賜之利
陛下必以爲娛玩之物於民無損不知奸貪憑藉因
緣爲利招引殊方營圖攘剋即如狡獬本非澤國所
產假借意指入海宣索驚擾寰中貽譏海外是 陛
下忽細行之矜而爲大德之累也疏入留中眷知中
官咸疾公乃誣摭公黨比高瑤和同貪墨 上怒遣
刑部員外郎李行會同巡按御史徐同愛鞫之行同
愛畏眷不敢反異復賂公所黜吏張褰令誣執公褰
不從行等阿眷執褰拷掠褰曰死即死耳安敢以私

憾減公義陷正人也行等羅織無所得乃誣公矯制
發粟意在侵欺褒獎屬官志圖報謝論罪當徙奏入
詔奪公官遣錦衣衛千戶張福建公士民數萬人號
泣遮留以衛士辟除乃得出省城至南昌疾作卒於
石亭寺時年五十八友人翰林張元禎爲治殮事以
䟽綵裹尸而已或咎其薄元禎曰公平生清苦殮以
時服此公志也張褻乃上言臣聞周公元聖而四國
之謗乃致上疑於其君曾參大賢而三至之言不免
搖惑於其母是豈成王之不明參母之不親哉凡以
口能鑠金而毀能銷骨也 陛下臨御區宇明並且

月恩同父母詎圖怙冒之中尚罹屈抑覆盆之下復有沉寃竊見廣東布政使陳選素崇正學夙抱孤忠予處羣邪之間獨立衆憎之地太監韋眷通番敗露知縣高瑤按法持之陳選移文嘉獎以激貪懦固監司之體也柰何宋旻徐同愛怯勢保姦首鼠兩覷以致韋眷橫行胷臆穢鱗清節熒惑聖明勘官李行承眷願指鍛鍊成獄竟無左驗臣本小吏以註誤觸法爲選罷黜寔臣自取非選有加於臣也眷乃妄意臣必憾選以厚賄啗臣令扶同陷選臣雖胥徒亦知廉耻安敢欺昧心術顛倒是非眷旣知臣不可利誘

乃嗾行等逮臣於理彌日拷掠身無完膚臣甘死籲
天終無異口行等乃依傍眷語文致其詞劾選勘災
不實擅便發倉曲蔽屬官意圖報謝是毀共姜爲夏
姬詬夷齊爲盜跖也本年嶺外地震水溢漂民廬舍
屬郡交牒報災老弱張口待哺而撫按藩臬若罔聞
知選獨抱隱憂食不下咽謂展轉行勘則民命垂絕
其何能待所以便宜議振志亦救民非有他也選素
剛正不堪屈辱乃爲勘官凌侮憤懣成疾旬日而殂
李行幸其就死不爲醫療又潛遣養子密以選死報
眷以快其忿小人佞毒交結權倖一至於斯司寇之

屬要在詰奸刑暴安取此輩爲也夫選砥節奉公橫
罹讒構君門萬里執諒其冤臣以罪人擯斥田野
秉耒自給百無所圖敢冒死披陳甘心鼎鑊者誠痛
忠廉之士啣屈抑之冤長讒佞之奸爲聖明之累
也奏入不報第以他事罷眷鎮守弘治初工部主事
莆田林沂疏雪公冤詔復官禮葬正德中追贈公光
祿卿謚恭愍

薛應旂曰余少時聞里中長老往往談公爲提學御
史時行事心竊慕之及長走仕途見縉紳先生輒稱
公爲真道學益勤向往邇承乏兩浙學政過公里第

知公加詳見張褫疏不覺憮然自失謂褫胥吏乃能若是昔孔明之李平廖立不是過矣人心其不死哉彼韋眷不足責也宋旻徐同愛李行叨冒襟裾顧甘心狗彘此又何說焉公固不待余傳而傳余因校士之暇特爲公書之以付台士俾張褫得以附見云

胡端敏公傳

胡端敏公者杭州仁和人也名世寧字永清祖嵩父璫嘗藉昌化公少爲昌化縣學生家貧衣食不給氣志浩如學行爲衆所推弘治壬子舉鄉試第二癸丑舉進士甲寅授湖廣德安府推官時岐王初就封國

府人驕橫公律以法王有言公對曰此 朝廷法即
殿下家法敢不守此 朝廷民即殿下立國根本敢
不恤旣復請民間開墾湖田以供柴課撫按欲與之
公曰此不惟使窮民失業他日各王府比例陳乞將
遂多事矣竟寢弗與自是岐府斂戢各屬豪民善訟
挾制官司效尤成風公悉抵以法郡遂刑清訟簡陞
南京刑部主事數辯疑獄決滯訟應詔陳時政邊備
十事不報其詳具公奏議中弘治末公復上疏其畧
曰臣自入官以來十二年間四至京師今往來道途
見村巷寂寥生理蕭索困窮之狀數倍於昔及至京

師見士大夫用度奢侈餽遺豐盛亦數倍於昔貪墨者皆言當去而貨賂狼籍者雖交章彈劾而猶存廉正者皆言當用而清介特立者或一人怨謗而即去士夫聚談惟及世情私鄙之事間有憂民爲國奉公執法者則衆共排擠百計謗毀必使無所容身此其勢必將盡驅天下之人閹然皆無忠義之氣而後已疏入值 孝宗不豫猶領之正德初遷員外郎時劉瑾用事瑾黨劉琅爲南京守備南官咸迎謁唯公與張嶺余祐查約魏校弗往初制部司設郎中員外郎主事正欲相叅謀議已乃郎中專擅司中政事多不

與寮案相聞沿爲故事及公爲郎中相約裁決可否
規正得失絕無猜嫌陞廣西太平府知府南徼土官
多不循分公撫以恩信絕其私饋子弟應嗣廕者輒
爲移文送部由是夷落皆感服效順太平州土官李
璿先世數犯革職繼營內侍得襲尋又阻兵拒命公
潛命龍英州官舍趙元珪捕斬之因大城壺關係治
蠻事上之丁母馮憂服闋赴部道逢流賊避入滄州
賊攻城甚急滄人搖抗約開門降管河通判趙廷璋
鄉官尚書張縉推公爲主公令軍民商旅登陴拒守
調度有法七日夜不寐城賴以全補湖廣寶慶府知

府約岷府毋受訟中人橫歛者悉裁以法治如太平
時遷江西按察副使整飭東鄉兵備值降賊王浩三
等復叛殺前兵備副使李情執叅政吳廷舉爲質公
議待降者以信服貳者以威已招者不殺再叛者不
招傳檄以諭賊奉吳叅政歸其殺李兵備者公仍進
兵勦滅之因城廣昌南豐新城三縣而還宸濠反形
已著人莫敢言公獨上疏其畧曰南昌失火延燒萬
室基地便利盡歸王府債負所責遍及閭閻莊田所
侵激民立寨三司多爲鈐束庶事受成而行買辦漸
行於外府搔擾遠逼於窮鄉臣下多懷二心禮樂政

令漸不出自 朝廷蓋自其奏討護衛以來威勢日盛乞戒諭止治其國毋撓有司有旨戒濠濠乃奏公離間親親妖言誹謗因令承奉涂欽齎萬金間用事諸大臣及䟽下都察院掌院石玠具復果摘禮樂政令不出自 朝廷數語以爲離間命巡按御史逮公公時適遷福建按察使已離原任濠遂譖公爲逃激差官校來捕且密通巡按浙江御史潘鵬必欲繫公江西困辱以俟官校公因間道走京師投繫詔獄刑訊逾年楚毒備至言官程啓充徐文華蕭鳴鳳邢寰等交章訟公寃久之得減死戍遼東瀋陽中衛凡四

載已卯夏六月濠稱兵叛逆僞命致仕都御史李士實爲左丞相舉人劉養正爲右丞相叅政王綸僉事潘鵬以下銜各有差巡撫都御史孫燧按察副使許達抗言不服皆縛出殺于惠民門外李士實等遂挾濠出南昌破九江南康進圍安慶潘鵬安慶人即前巡浙御史捧僞檄至安慶城下招降指揮崔文擒鵬子戮之固守力戰濠知不克將直抵南京又恐安慶躡其後計窮猶豫值督南贛軍都御史王守仁帥師討賊濠乃還兵大戰黃家渡守仁倡義鼓勇善用兵遂禽斬數萬俘宸濠以獻李士實等伏誅 朝廷窮

治助宸濠反者夷戮死徙者數十族獄滋蔓不能竟
向若公䟽得行豈至是邪自是復起公爲湖廣按察
使尋爲僉都御史巡撫四川聞 今上卽位天下延
頸以望治平公即薦魏校何瑋邵銳充講官林俊楊
一清劉忠林廷玉爲輔弼劉莊徐鉉爲知府有名忌
者擠之謂其才力不逮公䟽莊爲給事鉉爲御史孤
忠敢言即不逮宜採用其謀議松潘舊皆熟番其後
官軍不能制賂番以假道番殺漢人即匿不舉軍或
殺番至坐抵命公請選將更戍以振威酌遠近糧餉
以足食立賞罰之格嚴隱匿之禁修烽堠謹巡望以

通道路總兵張傑內臣張欽貪虐公劾奏罷免值嘉
靖新政鑒正德宦官鎮守之弊革不復遣天下翕然
稱更生矣召爲吏部右侍郎丁父憂去旣免喪即上
疏其畧曰今日以孝親爲大保民爲本願早定追崇
之禮而遂赦羣臣之失使講求拯荒弭亂之策而急
行之蓋能保民則 皇祖考享祀萬世 陛下萬世
之孝也因言新進英達今雖議禮有合而難保其事
事之皆是舊任老成今雖執禮過當而難謂其事事
之皆非蓋意存納約而人或未之諒也召拜兵部左
侍郎又奏請輔養 聖躬在慎起居節飲食金石草

木之藥勿宜常服且注大學秦誓章以戒媚疾洪範
唯辟威福章以戒威柄下移易繫節初九爻義以慎
幾事俱留中省覽大禮成陞俸二級給事中余經管
律劾公奏累留中且將開告密之端公乞罷不報丙
戌命公知武舉薦李承勛何孟春自代引疾改南吏
部左侍郎進南工部尚書召爲左都御史尋改刑部
尚書用霍韜言仍爲左都御史加太子少保入見辭
免宮保請虛心待物毋以喜怒爲用舍 上嘉納焉
公素剛嚴及掌都察院務持大體申明憲綱乞復執
法被誣者官考察枉者許言官會疏論辨詔付所司

施行僅逾月改刑部尚書益公雖預議典禮而奉公持正其諸事體多與當路異同不久在院者實踈之也初土魯番自弘治以來挾哈密城印以要中國而哈密回夷居甘肅城者爲內應至正德間遂招土魯番兵侵甘肅兵備副使陳九疇知其謀悉索城中回夷得衷甲者杖殺之以示番且募屬夷劫番營又結瓦剌使據哈密九疇自搏戰敗土魯番兵會總制彭澤經畧哈密奉勅諭速壇滿速兒火者他只丁還哈密城印九疇留勅不與土魯番計窮陰遣間使寫亦虎仙以秘術干進得與養子列知兵部尚書王瓊與

彭澤交惡即誣奏澤九疇罪瓊爲覆奏下九疇獄論
死澤削仕籍衆皆不平嘉靖更化初言官首劾瓊戍
榆林起澤爲兵部尚書加太子太保九疇爲僉都御
史巡撫甘肅連破土魯番兵斬火者他只丁絕其貢
賜番回失利大困敵後霍韜欲復哈密議召王瓊爲
陝西總制瓊遂謀報怨使王邦奇聶能遷上言哈密
之不能興復者由陳九疇妄殺啓釁也遂執九疇下
獄仍論死將并罪澤公獨上疏具論回夷奸狀訟九
疇功上大悟曰甘肅事得胡世寧說始知豈得殺
我巡撫償回子命耶九疇免死戍遼東澤爲民尋轉

公兵部尚書加太子太保陳兵政十事皆深切時務
而其要尤在於愛惜人才土魯番刼曲先衛人牙木
蘭以爲將牙木蘭擁族帳內徙土魯番遣使求牙木
蘭將甘心焉大臣即欲與之以易哈密公曰曲先本
服屬中國牙木蘭反正歸順非納叛比而哈密空城
懸達無益事實土魯番用以爲餌將攜貳我屬夷宜
勅王瓊爲國忠謀先盡復瓜沙之地悉收亡失屬夷
封殖哈密永爲不侵不叛之臣厚牙木蘭以風蠻夷
使相攻制此伐交之術也因薦御史馬昊陳九疇副
使施儒揚必進堪爲將帥皆不用公遂引疾乞致仕

三疏始得請甫歸復召爲南京兵部尚書不出但請
廣圖繼嗣容直言惜人才而已未幾卒于家時嘉靖
庚寅九月晦日也年六十三贈少保謚端敏云公嘗
謂學貴經濟不在詩文故其奏議二十卷及所著書
數十種皆有益於世務非空言也子純以公廕歷官
廣東肇慶府知府所至以循良稱立心制行克承厥
考能世其家

薛子曰余爲南考功時肇慶爲宗人府經歷嘗屬余
傳其先公余謂胡公國之名臣世之聞人史官將立
傳無俟余言矣及余督學兩浙居杭州考其鄉之先

達而景行焉于肅愍公之後唯胡公之賢爲最著其
諸若僉事王琦之清介郎中項麒之廉孝太僕卿邵
銳之端方太常少卿鄭環之嚴正豈不卓行君子褒
然傑出之人品哉然槩觀杭之士習則猶未免崇勢
利而羞賤貧尚通達而賤名檢豈數君子不足以風
之邪追考遐泝蓋自宋南渡君臣偏安燕樂靡麗所
漸已成痼疾雖經重熙累洽之後化導勸率之餘而
極重難反亦其勢然也余故特爲胡公傳而因并數
君子論著之與後死者同觀法焉

費文通公傳

費文通公者廣信鉛山人也名案字子和先世出蜀費禕後元季名禾者爲弋陽尉始家鉛山禾之後名本二者公五世祖也本二生廣誠廣誠生榮祖榮祖生應麒應麒生五男子曰珣鄉貢士曰瑄舉進士貴州右叅議曰璠生子宏以狀元及第歷官少師謚文憲自是榮祖應麒及璠皆累贈少保曰璵公父也以公貴累贈太子少保禮部尚書曰瑞鄉貢士公之姪懋中復以進士及第第三人爲翰林編修懋賢以進士爲兵部郎中費之族遂甲於江右聞於四方矣始璵娶張氏姪公七月而生弱僅盈掌然啼聲若鐘左

耳下有七黑子識者知其非常人長益秀穎年十七
補縣學生邵文莊公爲提學副使甚奇之文譽日起
正德丁卯舉江西鄉試公時娶上饒婁郎中女與寧
濠之妻兄弟也揭榜之明日濠別設鹿鳴燕於府第
燕所舉九十五人其意實以公故公稱疾不預及計
偕北上復以厚贐遺公公亦遜辭不受辛未登進士
選庶吉士癸酉授翰林編修以公差過江西省城例
當見濠值濠生辰燕三司官公亦預焉濠出所畜金
線龜六以示公且問曰此何徵也公曰殆壽徵也濠
曰汝獨不聞寧王遺我大寶龜乎公即應聲曰慎勿

爲此言下文有西土之人弗靖濠默然濠乃懸高
皇帝御容於殿率各官朝見公曰殿下自有始封之
君不當上僭高廟濠怒公率各官退差畢還京會
濠賂貴倖謀復護衛值文憲在內閣公歷陳利害力
贊不可忽矯旨罷公兄弟官比歸濠遣人陰伺於途
公小舟微服夜數易泊所以避不測已而文憲舟果
爲濠黨所焚僅以身免及抵家濠猶使羣盜劫掠公
家掘先世墳墓已卯濠據南昌叛下九江南康攻安
慶遠近繹搔適都御史王先生守仁將徵兵會勦公
間道迎以上書曰先定洪州以覆其巢穴扼上游以

遇其歸路彼進退失據將成禽矣王先生納其策濠
果敗其書具在闡幽錄中辛巳今上繼大統復起
公編修充經筵官嘉靖壬午預纂修武廟實錄未
幾丁母張夫人憂服闋以實錄成陞左春坊左贊善
公在講筵凡進講尚書孟子者六明白剴切上每
改容聽焉丁亥陞南京尚寶司卿庚寅改右庶子兼
侍講掌南翰林院事癸巳陞南京右通政甲午改南
國子祭酒先是文憲謝事家居乙未再召入內閣爲
元輔適調公爲北祭酒公上疏懇辭且寓書文憲謂
吏部雖以年資見推兄雖內舉不避親案則不足以

當此况兄方復召未及薦一才賢顧首及弟宋天下
其謂兄何因薦南太常少卿高陵呂先生柟爲北祭
酒公仍居南時論歸公丙申陞南禮部右侍郎尋改
南吏部右侍郎是年 九廟覃恩給誥命廕子懋學
爲國子生辛丑改兵部左侍郎南吏科王給事中燁
論公儒臣當此北虜竊發之時不當居兵貳公遜謝
之謂王爲益友終身歎服壬寅 上以公講幄舊臣
復改禮部左侍郎兼翰林院學士公應制奏靈雨嘉
禾諸頌 上俱見褒納冬至大祀園丘命充導引官
甲辰陞禮部尚書仍兼學士掌詹事府事未幾命掌

部事自是舉大典禮議大政事公咸殫盡厥誠不嶽
嶽以矯名不媮媮以徇俗上由是知公而眷注益深
矣乙巳太廟完加太子少保凡冊妃告廟及遣祭
諸神祇咸以命公應制諸文多命公撰金幣賞賚日
益加厚丁未二品考秩上遣中使賜羊酒寶鏹特
諭加太子太保賜飛魚服玉帶尋復加少保蓋欲大
用公也戊申公痔疾作治弗愈十二月十三日卒
上聞而悼之爲之輟朝且猶以金幣賜及其家遣官
護柩祭塋贈光祿大夫謚曰文通云公豈弟仁厚好
賢樂善稱人之長而掩人之短其在太學諄諄訓誨

諸生而嘉稔體恤無不周悉真所謂賢愚皆得其益者至於篤故舊恤孤弱撫僕御悉皆從厚有緩急相干者不問所從來輒遺刺帖爲之抹解寧爲人所欺而不悔雖或受謗而不辭蓋天性然也公生成化癸卯三月十四日距卒六十有六年初娶即婁氏以產卒繼娶金谿吳都御史女復卒俱贈夫人子五人長即懋學讀書績文以廕授後軍都督府都事陞經歷調詹事府主簿次懋升懋謙懋禕懋泰皆服公之訓能世其家

薛子曰余爲太學諸生時值公爲祭酒以文藝受公

之知亦謂公爲和厚人也及釋褐爲九江教授署白鹿書院見江西士人謂寧濠初畜異志結納中外一時雖以磊落自許者亦多入其黨不特喪身敗名以罹赤族之誅而誤國殃民可勝道哉公爲濠姻戚輒覩于未萌早與仇絕寧爲侮辱排擯而不一受其牢寵卒至保族全名以榮顯終其身豈不卓有高見遠識者哉及觀辭召薦賢心服言官論列其大致益可知矣論者徒見公之和光溫厚遂以公爲太易而不能知公之心事則寔介介故大節所在蓋有人所不能而公獨能者世或未之察也其視邊幅崖異而中實

汨沒者相去何如哉公之子懋學謂家乘不可無余言余故論著之以闡公心行之大者云

于肅愍公傳

公名謙字廷益別號節菴浙江杭州錢塘人也其先家河南在宋屢有顯官金末兵亂譜牒僅存而亡其名有名伯儀者公四世祖也遷雲中元初收括新附復遷薊州仕至太常丞伯儀生夔起家率書累贈河南北等處行中書省叅知政事夔生九思爲湖南道宣慰使延祐間遷杭州路總管致仕遂家于杭之錢塘公會祖也祖諱文大仕國朝爲兵部主事改工

部父彥昭不仕自曾祖而下皆以公貴累贈榮祿大夫少保兵部尚書公生七歲僧蘭古春奇之曰此他日救時宰相也長爲縣學生即以文行名永樂庚子中浙江鄉試明年辛丑舉進士宣德丙午授山西道監察御史公風儀峻整聲音洪暢每入侍奏對上必注聽掌院都御史顧佐甚器重之及巡按山西奏白誣獄出數百人於死王府以和買害民者廉其事劾治之比還復管理河道官民上下運船往復關閘啓閉不相妨滯人皆稱便上親征武定州罪人旣得命公數其罪公辭嚴義正啓口而成自是受知于

上屬意用公矣庚戌河南山西災 上親擢公兵部
右侍郎賜勅前往賑視時公年才三十有三而持重
練達徧歷經畫問民所利害而興革之民大悅九載
秩滿進左侍郎公在鎮久恒以盈滿爲懼嘗欲乞歸
舉叅政孫原貞王來以自代值中官王振用事公多
與忤遂嗾言者劾公擅自舉代左遷大理少卿二省
士民赴闕乞留乃復命公巡撫正統丁卯復兵部右
侍郎進理部事已巳虜酋也先寇獨石馬營猖獗
上詔親征公與尚書鄺埜懇留不允八月望師次土
木虜奄至皇輿北狩京師大震時公獨任部事北望

號泣誓以滅虜會 皇太后命郕王監國廷論土木之變罪歸王振錦衣指揮馬順素附振衆猝順擊死復索振所親信二內侍將擊之班行誼攘無復朝儀王疑懼欲退諸大臣亦多歛避公堅立不動掖 王且留請降旨宣諭羣臣順罪應死勿論其二內侍請太后命將軍亟擊死衆乃定公袍袖爲裂吏部尚書王直執公手曰今日正賴於公若直等何能爲進兵部尚書固辭不獲首劾扈從失律周興祖王佐寘之法王嗣位尊 上爲 太上皇帝以明年庚午爲景泰元年公入見泣曰虜賊犯我邊疆遮留大駕將圖

深入當預爲計宜亟募兵易漕卒治器械守九門列營伍於門外以振軍威徙廂民於城內以避虜掠通州貯糧數百萬卒難運入令在官食糧者悉詣關支大同宣府經虜剽掠請勅各守臣協力防鎮文臣如軒輓宜爲巡撫武臣如楊洪柳溥宜爲將帥其諸機務臣請身任其責不效則治臣之罪上皆嘉納行之太監喜寧原係胡種土木之潰歸降也先爲之嚮導奉車駕趨紫荆關京師戒嚴侍講徐珵謬言占象倡議南遷事聞六官人心搖動公抗言於廷曰京師天下根本宗廟山陵社稷帑藏倉儲咸在於此百官

萬姓四海九州咸仰屬於此一動則大勢去矣宋南渡之事可監也 上是公言守議遂定主將石亨復爲異議欲盡閉九門堅壁以避賊鋒公言不可請率先士卒躬擐甲胄出營德勝門外以示必死三軍威奮勇氣自倍十月朔也先入紫荆關以送 駕爲名前驅突至我軍堅不爲動喜寧嗾也先邀大臣議和需金帛萬萬計衆皆大呼曰國有君矣對壘凡七日十月望虜奉駕漸遠乃舉砲擊虜營虜死者萬計也先宵遁京師解嚴論功加公少保固辭不得已受之大同叅將許貴奏欲遣使議和以緩虜兵公謂去冬

遣都指揮李鐸指揮岳謙厚齎金帛以往虜輒深入
繼遣通政王復少卿王榮往議迎復亦不見駕而回
虜譎詐莫測和不足恃莫若選將練兵養威畜銳以
復君父不共戴天之讐無輕遣使以取其侮從之又
謂喜寧不除虜靖無日乃以計授楊俊擒送京師誅
之辛未也先遣使入貢請送 駕還京下廷臣議公
曰君臣大義兄弟至親當速遣使奉迎萬一虜詐我
有辭矣議乃決秋九月 駕至自虜廷初北邊獨石
馬營八城爲虜所據公即奏起都督孫安授以方畧
率兵度龍門關且戰且守八城復完公謂京兵分隸

五軍神機三千諸營者雖各有總兵然不相統一或遇調發兵將不識卒難濟事乃議以諸營馬步兵擇其精者十五萬人分爲十營每營以一都督總領之每五千用把總都指揮一人每千用把總指揮一人每隊用管隊官二人團結訓練兵將相識有警當調某營則自其總領都督以下督率以行號令專一行伍不亂知兵者善之楊俊素恃功跋扈奏盡出營兵併調三邊各路軍馬大舉勦虜公執不可曰如此則京師各邊皆空虜或分兵牽制何以應之上從公言俊謀遂奪貴州苗夷作亂侍郎何文淵奏乞罷布

按二司置宣慰司土官以蒞之公謂貴州自祖宗
開創八十餘年豈可因小寇而輕棄乎事遂寢初也
先犯京師石亨因公成功驟躋侯爵心不自安乃奏
公子冕授府軍前衛副千戶公曰一腔血不知灑在
何處尚欲爲子求官乎懇辭不許仍賜第一區又辭
不許乃以平日所得賜物盛甲袍帶之屬移置第內
封識加謹公握兵久宿將歛伏石亨貪縱尤爲公所
裁抑亨姪彪驍悍同握京兵公乃奏遣往戍大同二
人遂憾公思有以傾之矣丁丑正月景帝不豫廷
臣上章乞復儲未報英皇復正宸極亨等以奪門

南內遂貪天功爲己力即誣公迎立外藩與大學士
王文六七大臣俱下獄所司以金牌勅符具存無迹
可據亨等必欲置公於死會徐理者以倡南遷爲公
所斥久不獲進因易名有貞尤嚙公者廷鞫之日力
言大肆拷掠宜無不承文不勝忿力辯不已公曰亨
等意已如此辯之何益所司承亨風指乃以意欲二
字附會成獄蓋即莫須有之故智也是月二十三日
狀上 上猶豫良久曰謙實有功衆未及對有貞直
前曰若不置謙於死今日之事爲無名 上意乃決
公刑之日沙霧四塞朝野冤之公生於洪武戊寅四

月二十七日至是年六十所司籍公家自朝廷所
賜外他無一物 皇太后初未知公刑比聞嗟悼累
日 上悟其冤深悔之都督陳達收公遺骸踰年冕
詣達扶歸葬于西湖之南迨至 憲廟遣官諭祭特
謚肅愍云嗚呼公平生忠誠狷介不立私黨身值危
疑計安社稷大業在天下公論在人心一時之屈萬
世之信公亦可以無憾也已

論曰天道好還其真遠而邇微而顯昭然其不爽哉
方享有貞之構成公獄也自以爲快其私忿且張威
福矣未幾有貞以罪達寬亨等坐謀逆夷族公則不

惟勅祀于杭大啓爾宇而山西則祀河南則祀隨
在血食公固不死矣此固人心不息之機而天之報
施何如哉余拜瞻公像英爽凜然詎謂杭俗披靡公
真山嶽矣金匱有傳人未獲窺余忝司學校特采公
家乘掇其大都俾諸士知所仰止不外於鄉之先達
云